

Skýrsla stjórnar UT-kvenna fyrir 2008-2009

Fagfélagið UT-konur er nú að ljúka sínu fjórða starfsári, en það var stofnað 25. maí 2005 á stofnfundi þess í Háskólanum í Reykjavík.

Aðalfundur félagsins 2008 var haldinn 23. apríl kl.17:00 á 3. hæð í Háskólanum í Reykjavík og var dagskrá samkvæmt samþykktum félagsins.

Kjósa þurfti í stjórn og formann fyrir árið 2008-2009. Anna Ingólfssdóttir, Elín Granz, Jóna Pálsdóttir og Þórunn Óskarsdóttir gengu úr stjórn en í stjórn voru kosnar:

- Þóra Halldórsdóttir, formaður
- Dísá Anderiman,
- Hrönn Þormóðsdóttir,
- Kolbrún Svala Hjaltadóttir,
- Marta Kristín Lárusdóttir,
- Sigríður Magnea Björgvinsdóttir,
- Steinunn M. Sigurbjörnsdóttir.

Á fundinum var farið yfir það sem helst hefur verið á döfinni á árinu og sköpuðust skemmtilegar umræður um hin ýmsu málefni.

Lagðar voru fram tillögur að breytingum á stofnsamþykktum félagsins og voru þær samþykktar.

Gerðar voru breytingar á markmiðum félagsins og jafnframt kallast þær nú félagssamþykktir í stað stofnsamþykktar.

Að loknum aðalfundarstörfum hélt Ólafur Andri Ragnarsson erindi sem vakti mikla lukku. Var fundurinn í heild bæði skemmtilegur og fróðlegur.

Veitingar voru í boði Háskólans í Reykjavík.

Stjórnin hefur haldið reglulega fundi mánaðarlega og stundum oftari. Stefnumótunarvinna og markmiðasetning félagsins hafa verið fyrirferðamikil auk þess sem umræður hafa verið um hvort það að við séum ekki sjálfstætt félag heldur faghópur innan SKY sé á einhvern hátt að hamla starfinu eða fæla konur frá. Stofnun hópsins „Tæknitátur“ gefur til kynna að sumar konur vilji hafa hlutina á annan og einfaldari hátt og er það vel.

Í janúar 2009 áttu UT-konur fund með hluta af stjórn SKY þar sem staða UT-kvenna innan SKY var rædd. Var rætt um væntingar hvors um sig til samstarfsins, réttindi og skyldur.

Áfram var áhersla á að efla innra starf með fræðslu- og skemmtifundum, en þó var ákveðið að helga þennan vetur kynningarátaki til að hvetja ungar stúlkur til að kynna sér upplýsingatæknina.

Mikill áhugi, bæði innan stjórnar og utan, hefur verið fyrir því að kynna fagið meðal ungra kvenna með það að markmiði að stuðla að fjölgun kvenna innan tölvu- og upplýsingatækninnar.

Með það í huga héldum við hugarflugsfundi þar sem hugmyndum var kastað á milli og hefur afrakstur þeirrar vinnu nú litið dagsins ljós í formi myndbands og fræðslupakka, sem sendur hefur verið á alla grunn- og framhaldsskóla landsins.

Þann 5. nóvember komu UT-konur saman og áttu skemmtilega, fræðandi og notalega kvöldstund þar sem við lærðum að efla sköpunarkraftinn undir handleiðslu Guðbjargar

Gissuradóttur. Guðbjörg er grafískur hönnuður og hefur áralanga reynslu af því að vinna með skapandi og frjóa hugsun. Við prófuðum að nota aðferðina til að koma með nýjar hugmyndir að því hvernig við kynnum ungu stúlkunum störf okkar/starfsumhverfi og stuðlum að því að fleiri konur bætist í hóp þeirra sem leggja fagið fyrir sig. Komu fram ýmsar gagnlegar hugmyndir sem við síðan unnum úr.

Í kjölfarið hófst stjórn UT-kvenna handa við gerð kynningarmyndbands sem ætlað er að gefa innsýn í líf og störf kvenna sem starfa innan tölvu-og upplýsingatækninnar. Tilgangur myndbandsins er að vekja áhuga ungra stúlkna á möguleikum og fjölbreytileika þeirra starfa sem bjóðast í faginu.

Tekin voru viðtöl við konur sem starfa á ólíkum sviðum innan fagsins og vonumst við þannig til að gefa áhugaverða sýn á fagið og þau störf sem í boði eru.

Viðmælendur voru beðnir að lýsa hefðbundnum degi í vinnunni, hvað þær eru að fást við og hvað það er sem gerir starfið áhugavert.

Haldnar voru kynningar á myndbandinu í framhaldsskólum á höfuðborgarsvæðinu og á Suðurlandi, en UT-konur heimsóttu skólana í hádegishlé, sýndu myndbandið og ræddu við nemendur. Myndbandið er hægt að nálgast á slóðinni: <http://www.sky.is/utkonur-myndband.html>

Í framhaldinu var ákveðið að senda "Fræðslupakka" til allra grunn-og framhaldsskóla landsins til að koma efninu á framfæri við stærri hóp. Í þessum fræðslupakka er mynddiskur(DVD) með myndbandinu, upplýsingar um nám frá háskólunum auk upplýsinga um UT-konur og SKY.

Hluta af þessum skjölum má nálgast á vefsíðu okkar, www.utkonur.wordpress.com, undir "Myndband – Fræðsluefni"

Er það von UT-kvenna að myndbandinu verði gerð góð skil og efnið kynnt fyrir nemendum hvers skóla.

Átak sem þetta kallar á vinnu og samtakamátt margra aðila.

Jákvæð viðbrögð og velvilji fyrirtækja og viðmælenda í myndbandi auk ómældrar vinnu UT-kvenna hafa gert þetta verkefni að veruleika.

Það sýnir að þegar viljinn er til staðar og margar hendur vinna samtaka að settu marki, þá eru okkur allir vegir færir.

Vonandi skilar þetta átak sér í vaxandi áhuga ungra stúlkna á upplýsingatækninni og raungreinum yfirleitt.

UT-konur, félag kvenna í upplýsingatækni, er faghópur innan SKY, Skýrslutækni­félags Íslands.

Allt starf UT-kvenna við vinnslu þessa fræðsluefnis var unnið í sjálfböðavinnu og það sama á við um þá sem fram komu í myndbandinu, en til framleiðslu og fjölföldunar á mynddisk og útsendingu efnis nutum við stuðnings frá styrktaraðilum.

Samtök Iðnaðarins er aðalstyrktaraðili okkar en einnig fengum við styrk frá Háskólanum í Reykjavík og SKY. Viljum við þakka þessum aðilum sérstaklega fyrir þeirra framlag.

UT-konur þakka öllum aðilum sem komið hafa að gerð myndbandsins og fræðslupakkans í heild, bæði þeim sem fram komu í myndbandinu svo og þeim tóku þátt í að heimsækja framhaldsskólana með okkur ásamt öllum þeim sem á einhvern hátt hafa styrkt okkur eða veitt okkur stuðning og aðstoð á einhvern hátt.

Bestu þakkir til ykkar allra!

Framtíðarsýn og verkefni í vinnslu

Umræðuefni stjórnar UT-kv­enna hafa verið af ýmsum toga og við farið vítt og breitt í hugmyndum okkar um starfið.

Helsta umræðuefni stjórnar á liðnu ári hefur þó verið um leiðir til að ná til ungra stúlkna og hvernig við getum stuðlað að því að fleiri ungar stúlkur sæk­i sér nám á þessu sviði.

Aðallega höfum við haft í huga að opna augu stúlkna fyrir þeim möguleikum sem bjóðast innan þessa geira (tölvu-og upplýsingatækni), en tölvunarfræðin hefur jafnan haft á sér ákveðinn „nörda“-stimpil, sem verður til þess að fjöldi stúlkna íhugar ekki einu sinni möguleikann á að skoða tölvunarfræðina eða skyldar greinar. Jafnframt hefur okkur þótt ástæða til að kynna fyrir þeim að það eru ýmsar leiðir inn í þennan geira og það er hægt að sameina áhugamál á öðru sviði með því að starfa innan tölvu-og upplýsingatækninnar.

Er það von okkar að gerð myndbandsins og dreifing fræðsluefnis til allra grunn-og framhaldsskóla landsins muni verða til þess að víkka nám-sjón­deildarh­ring menntaskólanema og kveikja áhuga hjá sem flestum fyrir því að hefja nám á þessu sviði eða í það minnsta íhuga það.

Vonumst við jafnframt eftir áframhaldandi samvinnu og stuðningi háskólanna, SKY og sem flestra sem að þessum málum koma. Því með sameinuðu átaki gerast ótrúlegustu hlutir.

19. maí 2009

Þóra Halldórsdóttir,

formaður UT-kv­enna, Félags kv­enna í upplýsingatækni